

Every Church a Study Center



Christian Marriage ©

Conrad Jun Tolosa

Revised November 21, 2021

Part One: Ang Pag-aasawa Panimula

Matapos likhain ng Panginoong Diyos ang sansinukob binigyang pansin Niya na hindi mabuti na ang lalaki na Kanyang nilalang ay nag-iisa. Kaya minabuti ng Diyos na hubugin ang isang babae upang magkaroon ng katuwang at kabalikat ang lalaki sa kanyang buhay. Sa pagkalikha ng mag-asawa, binigkas ng Diyos na iiwan ng lalaki ang kanyang mga magulang upang makiisa sa kanyang kabiyak ng puso.

Nang likhain ng Diyos ang tao, kasama sa kanyang kalikasan ang dalawang naisin, ang sumamba at maglingkod sa lumikha sa kanya. Ang tamang pagsamba sa Diyos ay nararapat na galing sa pusong may tiwala sa Kanyang salita at ang tamang paglilingkod ay yaong tugma sa Kanyang kalooban at kautusan na masusumpungan sa Genesis 1:28: *Magbunga kayo at magparami; punuin ninyo ang lupa at lupigin ninyo ito. Pamahalaan ninyo ang mga isda sa karagatan at mga ibon sa kalangitan at lahat ng hayop at anumang gumagapang sa lupa.* Sa unang utos na ito, maliwanag ang layuning ibinigay ng Diyos sa tao patungkol sa kanyang paglilingkod.

Hindi mahirap unawain ng mag-asawa ang three-fold mandate na ibinigay ng Diyos sa kanila:

- 1) Bumuo ng pamilya, palakihin ang mga anak ayon sa Kanyang wangis at pagdating ng tamang panahon ay hayaan silang bumuo ng sariling pamilya - - kaya mapupuno ang mundo,
- 2) Gawing produktibo ang buong kalupaan. Magpatubo ng lahat ng uri ng puno na nagbubunga at gawing maganda at maayos ang buong kapaligiran tulad ng Garden of Eden sa pamamagitan ng pagpaparami ng iba't ibang klase ng tanim at bulaklak. Ang lahat ng nilikha ay para sa kapakinabangan at enjoyment ng lahat kaya dapat silang pangalagaan at palaguin (Genesis 1:28;1 Timothy 6:17b).
- 3) Pamahalaan ang mga nilalang ng Diyos sa mundo.

Lahat ng kailangan para matupad ng mag-asawa ang mandato ng Diyos ay, pinagkaloob ng Diyos sa kanila. Karunungan, kalakasan, resources at mga abilidad. Ang pag-aasawa ay banal sa harapan ng Diyos at masama na paghihiwalayin ng tao.

Ang hardin ng Eden ang ihinanda ng Diyos upang magsilbing tahanan para sa mag-asawa at maging modelo na rin para sa pinapagawang expansion nito para sa pagpaparami ng pamilya at pagpapalaganap ng tao sa mundo. Ang ideal marriage ay ang pagbubuklod ng isang ideal man at ng kanyang ideal woman. Nauunawaan nilang pareho ang layunin ng pag-aasawa at malugod nilang isasakatuparan ito.

1. Ang Marriage Vow

Pakikipag-isang dibdib. Ito ang salitang ginagamit kapag ang pakay ay bigyang halaga at malalim na kahulugan ang pag-aasawa. Ang kasabihang *Lalagay na sa tahimik* ay tumutukoy sa mga magugulong

happening ng single life. Ang kasabihan namang *Magsasarili na* ay nagpapahiwatig ng direksyon sa buhay na lalabayin ng magkasintahan. Ang laman nito ay hindi na sila aasa sa kani-kanilang magulang at sila ay mananahan nang hiwalay sa kanila.

Subalit, nahulog ang tao sa kasalanan at ang kanilang kalikasan ay dumanas ng drastikong pagbabago. Matindi ang naging epekto ng kasalanan sa buhay ng tao. Ang sumpang binibitawan sa kasal, bagamat puno ng kahulugan ay buwang bibig lamang. Ito ay madaling sabihin subalit napakahirap gawin. Ang lalaki at babae na ikinakasal ay parehong nangangako sa harapan ng Banal na Diyos at sa harapan ng tao na sila ay magmamahalan sa sakit man o kalusugan, sa hirap man o ginhawa, habang sila ay nabubuhay.

Aminin man natin o hindi, ang pag-aasawa, ang pakikipag-isang dibdib, ang paglagay sa tahimik, o ang pagsasarili ay hindi tunay na nauunawan ng mga kinaukulan. Kadalasan pa nga, para itong *talon sa dilim* o *tindig sa ulap*; walang sapat na pang-unawa sa gagawing pagbubuklod ng damdamin.

2. Ang Period of Adjustment

Boy meets girl. They fall in love. Sila ay nagpakasal. Nagpatayo sila ng bahay o kaya naman sila ay nangupahan. Nagka-anak sila - one boy, one girl. And they lived happily ever after. Perfect. Subalit hindi tayo nabubuhay sa perfect world. Sabi nga, it only happens in the movies. Hindi nangyayari ito sa totoong buhay. Sang-ayon tayo diyan.

Ako ay naniniwala na dito sa ating bansa ang karamihan sa mga mag-aasawa ay walang ginawang preparasyon, o kung meron man ay hindi sapat. *Sige na, tatal nandidiyan na yan! Ayaw ko nang maghintay pa.* Ito ang kadalasang dahilan sa pagdulog sa dambana ng kasalan.

Pagkatapos ng honeymoon, eto na. Bigla na lamang darating ang realidad na ang pag-aasawa ay may kasamang maraming responsibilidad. Ang mga tungkulin ng isa't isa ang magiging kadalasang paksa ng usapan -- gustuhin man nila o hindi. Pero, kailangang pag-usapan. Kasi, hindi puwedeng makawala sa responsibilidad ang tao sa totoong buhay.

Ang period of adjustment ang kabuntot ng honeymoon. Kung gaano kahaba ito ay magdi-depende sa level of maturity ng lalaki at ng babae. Ang nagbabagang damdamin sa isa't isa ay unti-unting mapapawi. Ang pagkauhaw sa lambingan ay madali nang ma-satisfy. For the first time sa kanilang relationship, makikilala nila ang isa't-isa sa ilalim ng maliwanag na buwan ng katotohanan. Ang mga maling akala ay naitatama. Ang mga shortcomings ay lumilitaw. Ang mga kakulangan ay umiibabaw. Kung paano magreact sa mga rebelasyon na ito ang mag-asawa ang magsusukat kung gaano kahaba ang kanilang magiging period of adjustment.

Ang responsibilidad sa pagpapatupad ng three-fold mandate ay ibinigay sa lalaki. Ang responsibilidad ng babae ay maging katuwang ng kanyang asawa upang ma-accomplish nila ang kanilang God-given objectives in life. Ang lahat ng mga ito ay dapat isaalang-alang ng mag-asawa.

© Revised: November 21, 2021 Conrad Jun Tolosa

All rights reserved. No part of this material may be reproduced, stored in a retrieval system, or transmitted in any form or by any means except for brief quotations for the purpose of review or comments, without the prior permission of the publisher, Philippine Biblical Worldview Foundation, Inc.